

摘藻堂四庫全書薈要

集部

欽定四庫全書薈要

集部

武漢集卷十五

十二

詳校官助教臣常循



欽定四庫全書薈要卷一萬四千二百六十五

集部

武夷集卷十

宋 余靖 撰

制誥

祕書丞直史館知諫院蔡襄可右正言直史館

知福州



勅具官某朕纂承洪緒懼德不明博延忠果正直之士
列于左右補其不及爾以文雅選在圖書之府而勁正
之譽達于予聞故自衆人之中擢居諫諍之列果能審

謇匪躬以弼予違而云報國之勤可圖事親之期有限
屢形封奏乞便庭闡朕忍以好諫之心而違爾就養之
懇是用特遷諫職歸領郡符外則為爾親榮又知朕之不
厭直言也乃身雖在外乃心無不在王室爾其勉之可
龍圖閣直學士文彥博可樞密直學士知益州
勅成都古之建國其地險遠其俗富奢機杼纂組號為
衣被天下而又西邇邛笮南接徼外故常擇近密之臣
當撫御之寄具官某外和內敏才周識遠頃者將漕并

土民不告勞繇是分之虎符付以戎律兼摠貊道以撫
夷落威信克著號令甚明來者慕其綏懷倍者不敢侵
軼二年于是境域以和故宜假其才謀移莅叢蜀遷之
美職以示優恩爾其無貪寬厚之名無習苛刻之治謹
爾條教休息吾民則得良牧矣往服休命可

龍圖閣直學士左司郎中知并州兼并代經畧
明鎬可右諫議大夫

勅國家遣侍從之臣居統率之任蓋俾其外宣戎畧下

恤民隱庶其臨機制變全師保勝而無遺策也具官某
體識沉粹謀慮周密屢委方面而州境以清專督餽運
而邊粟以阜唯并汾之要壤控戎索之衝道向擇周才
以當重委士卒樂用如倚長城羌胡畏威未嘗近塞雖
刀斗不擊而烽候甚明偏裨同緩帶之歡朝廷得高枕
之寄嘉爾茂績屬於朕心延登七人之列仍總三軍之
令爾其無惰而志無驕而卒使夷落懷附而邊隙不啓
則朕之委任有所賴焉虔茲休命可

吏部尚書知亳州夏竦可資政殿大學士

勅朕以君臣之義股肱同體進退之際恩意固深厥有
誠請實用嘉尚具官某才識通茂智慮周詳嘗登輔弼
之聯徧歷內外之任頃以羌戎倍惠闕隴宿兵遂由喉
舌之官付以節旄之寵諒憂職而成疾遽乞身而願還
是用改以方州遷其舊秩今覽來奏言其有瘳更思竹
帛之功請就邊防之寄朕方四隅罷役二虜講和顧彼
疆陲無煩舊老嘉其志尚推以恩榮以其嘗預機衡乃

遷此職當體予意往哉惟休可

翰林學士禮部郎中宋祁可吏部郎中

勅朕慎東俊德延登近署典司命令侍從帷幄所以宣
邦國之大謀訪古今之高議所懷忠實率多規補宜增
秩序以寵材傑具官某通識照遠人之儀表懿文高世
學者宗師而自雍容朝闈領袖儒館奉常樂志東觀史
編執簡撰述厥勤茂焉內閣以對右省更直咸推望實
益見材美登王室之署勸金華之講每觀通博之論愈

知遠大之期集課遷官固有常制羽儀之用朕所望焉
踐修厥猷往服休命可

鹽鐵副使吏部員外郎魚周詢可天章閣待制
知成德軍

勅中山近胡常山為之屑齒國之屏翰此為衝衢必擇
全才以兼文武之任具官某體識沉厚謀慮精深牙冠
彈非則權豪共懾牙籌佐計則財用皆豐言無瑕玷動
必詳練故宜延登內閣之班出領列城之寄爾其外修

民務內寓軍令召南之風方叔之任其兼之矣往哉汝諧可

兵部郎中李宗詠可鹽鐵副使

勅司會之府匪才不居任人之方求舊惟允具官某深
識夷曠雅性通和簪白筆而立朝登軺車而問俗咸著
美績間于周行嘗佐邦計實遷歲律三壤成賦九政均
財備見其勤克謹于職遽缺吏故出領方州事資練習是
用俾其牽復書不云乎三折肱知為良醫汝其往哉可

左衛上將軍致仕楊崇勲可太子太保致仕

勅朕嗣守洪業責成輔佐故於勞舊之臣恩意至厚具
官某頃事先帝逮予冲人入當機務之煩出領鼓輦之
任頃緣子累罷其虎符雖在退休之年授以環列之秩
示從薄罰以肅羣臣今以燔燎禮成蓼蕭澤廣尚授
印之重俾登儲傳之榮不次之恩汝其自省可

郢州防禦使魏昭炳可復觀察使

勅朕丕承帝圖寅念祀事裸鬯宗廟柴燎紫壇還御端

闡渙發大號曠蕩所及滯淹必振具官某器度宏遠體
識和雅謙恭自牧膚敏可嘉生於勲德之門不習綺紈
之氣早登撫仕嘗委廉車當折衝禦侮之任有辭難即
易之請俾從降秩用勵臨戎就第而來閉閣知懼宜蒙
茂渥再渙前榮勉思竹帛之勤以酬雷雨之澤

秘書丞集賢校理孫錫殿中丞秘閣校理晁仲
衍並可太常博士

勅某等國家開圖書之府應奎壁之像所以游英俊而

待材用也居是職者官無定員結課進秩固有常制錫
富文博學懷溫厚之風仲衍名家令器著秀翹之望並
列館閣能自修飭奉常清要禮樂是司書勞叙遷往服
休命可

權府推祕書丞祕閣校理楊孜可太常博士

勅某國家分職事以待材俊苟稱其任必躡等而進之
其官之本聯則參用古制三歲一視其庸而改其秩以
爾文思豪健識慮周敏參道山英俊之選贊天府浩穰

之治煩而試之悉著成效奉常之屬實典邦禮清途所
漸勿怠祇欽可

殿中丞曹穎叔等轉官

勅某等國家執八柄以馭羣吏董之以事任辨之以名
品善則賞之以勸能者爾等悉以俊器久登王官知朝
廷愛民之體得循良御事之要佐職專任咸著能聲容
臺尚局各遷華秩用示襄進往服嘉會可

右正言祕閣校理孫甫可右司諫知鄧州

勅朕稽式治道渴聞讜言必求端直之士以居諫諍之
列庶補闕漏期於無過然而臣子之節忠孝為本厥有
誠請難於重違具官某學通古今識照治亂智度純粹
議論詳正文該史野行周忠信早預書林之選屬講容
臺之儀知其懿實延登左右有犯無隱朕甚嘉之今以
卜附先塋願守便郡朕不欲奪人之恩以自助是用增
秩本省分任要藩夫偃息而愛民與夫從容而納忠其
道一也汝其勗之可

刑部郎中張鑄殿中侍御史劉湜並可三司鹽

鐵判官

勅某等昔者管仲以鹽筴而強諸侯建元置鐵官而佐
常賦其來尚矣因山海之利足邦家之用必資幹吏以
贊計籌以爾鑄器度沉厚當官有清勤之節湜才具通
敏立朝有審正之風臨民而簡易不苛參畫而浩穰稱
最並登司會之府庸膺擢材之選勉勵而守以荷休命
可

內殿承制知夔州陳宗古可供備庫副使

勅國家列郡國之官分軍民之政惟是亭障徼道用武之地必擇材勇兼領戎戍具官某資性果銳名稱著聞任以方州用觀器畧巴夔舊壤蠻獠雜居委之綏寧必選其材著于故事必進其秩援此成例于以推恩爾其安民撫夷以肅邊事無墜茲寵

前宿州臨渙縣令曹起可特授單州長史

勅某書曰宥過無大刑故無小盖用法之意期于大中

越有附輕之科宜啓自新之路以爾頃在官守抵于刑
書遽自隱藏遂以名捕近者按舉之吏頗為辯明如其
本原特示矜恤處之散秩俾其自思無怠省循以荷昭
洗可

光祿寺丞簽署并州軍士判官柳澥可著作佐
郎

勅某吾自邊陲宿兵以來思得高材強識共圖軍事故
於帥府之所慰薦率俞其請冀用人之路廣而謀國之

事精矣以爾詞章秀異識畧膚敏嚮者樞臣宣命于海之東其稱幹能數人而已爾在其選固已可嘉今著迹效所宜甄獎吾有高位唯待異才自勗圖功之心庶成舉類之美

都官員外郎知宿州李明允等一十四人

勅某國家設四善二十七最之令以辨羣吏之治自九品已上京官釐務于外者率三歲一結其治狀有司以聞而登進之示天下之不公也爾等策名仕籍咸著吏

能或領牧守以宣王風或分縣邑以勤民事贊賓晝均
國用者亡不成績吏今以爾狀上其勞當遷推恩報勞
勿忘祇荷

濠州鍾離令李覃可中舍致仕

勅某七十而還政於君傳事於子古之制也其能引止
足之分而從退逸之樂者必優其秩而遷之爾久服官
政今請老于家而追古人之風吾甚尚之

安保衡可大理寺丞知縣

勅某朕常思靜退守正有行之人而用之以激浮薄今
樞臣將命撫視邊徼而言爾往辭王官歸視父疾內行
可尚兼有幹材大臣差助吾意則靜退之士不能違矣
其善撫吾民無誤而知可

殿中丞士建中可依前官

勅某等古者人臣有喪三年不呼其門所以伸其恩也
爾等纏風樹之悲有樂棘之慕歲月其逝法當還臺賢
者不敢過不肖者不敢不及國之典也往踐茲命可

太子中舍王致用等六人轉官

勅某等國家命官以古名莅事用今制寺省之職率不
墮本曹之務而分仕內外以視其成爾等各以器能出
領事任或布慈和之政或稱幹濟之才考于有司悉應
最令升榮朝綬進秩春坊咸為叙遷恭服休命

供奉官張秉王祖禮並授內殿崇班

勅國家承平日久而兵不習戰人不習勇自西羌犯邊
歲用戈甲固常購募果敢訪詢智謀思得奇俊惟恐逸

漏徧詔近列各舉所知今其應令以爾為薦更詢績狀
頗見勤勞即登諸朝以示優寵爾其撫而士卒練而師
徒毋貪功翫寇善修戎政無忝爾榮可

陳州觀察支使聶開可著作佐郎

勅某國家體貌大臣作鎮近輔賢其賓佐薦聞于朝詢
之天官則稱其才者多矣即其幕中授以清秩所以示
吾寵待故老之意又欲其婉畫誠有所裨可

大理寺丞知陝府芮城縣李昭逢可右贊善大

夫

勅某國家自西鄙屯師關中之邑頗當餉道思得賢令
長以均其力役受詔者以爾名聞從其薦延付以百里
今著最狀能字吾民序進東朝用示褒寵可

前濟州錄事叅軍監汾州永利西監武肅可大
理寺丞

勅某國家設鹽鐵之官所以籠地財而佐國用克舉其
職則寵嘉之蓋旌其能非專於利以爾辦事之力體吾

愛民之心則無忝矣可

武安軍節度推官監延州入中倉馮經可祕書

丞

勅某國家自西羌旅拒已來所頒爵賞嘗在繩墨之外
雖所以收積俊乂蓋亦優禮帥臣爾自掌邊庾能足軍
食帥臣慰薦稱爾之才故不還天官之選即加仙省之
秩越次之寵無怠前勞可

司勳郎中知洪州下咸可衛尉少卿

十二人轉
官同詞

勅某等漢制郡守諸侯相考理迹之尤異者就增其秩
不易其任國家分命庶尹釐職于外必集其課而黜陟
焉古之制也爾等悉以材敏聞于朝廷班宣詔條省察
風俗能著治狀合於功令故嘉其最而寵之官卿寺郎
曹金閨之籍遞加名服無怠恪勤可

祕書丞邠州通判王稷可太常博士

六人轉
官同詞

勅某等國家以三載黜陟八柄予奪總攝羣吏撫寧庶
民克著善狀則用嘉寵爾等或詞藻敏贍或學術通博

題輿而贊郡條操刀而專邑治莅事賦政人得平一集
其歲課率應遷格爾其毋貪名譽以希進毋畏高明而
弛令吾不吝爵賞以待俊又撫我赤子予而懋官其勉
之哉可

禮賓副使張岳父義政可太子清道率府率致
仕

勅國家因邊鄙之聳寵戰守之勞嘉其事君之忠式懋
及親之寵某官張岳父義政勇敢之氣老而益壯頃歲

西賊軼我障塞能率宗黨共登城陴身被金瘡口不言
伐今以弼臣之請予舍之賢因其掛冠之年寵以垂綬
之秩噫予非私于而家盖欲壘場之人知圖功報國之
榮也可

張岳母竇氏封縣君

勅人之至親莫甚於母子至行莫重於孝愛緣情推寵
所以勸勞張岳母竇氏母教以嚴家庭有肅早勤三從
之善勗成諸子之材宜疇湯沐之封以示閨門之訓可

西京左藏庫副使桑宗望可文思副使差充河
北沿邊安撫都監

勅具官某國家以北平拒馬為塞積有年矣胡人通歡
輶車不絕于道武事之備未嘗一日懈之故擇知兵謀
曉時務者置使以統于堡障立佐以同其規畫以爾將
家之子膽畧過人屢經煩使頗聞勤盡是用遷之職秩
往護塞垣爾其撫士卒謹斥候無起邊隙以副朝命可
奏舉人前韶州樂昌縣令賈太冲可大理寺丞

勅某國家視民無遠近之異必擇慈惠明察之長以撫
安之爾字吾民于服嶺之外而能平獄寄恤時務百里
安堵有聞于朝宜升京署俾漸榮路其無怠前志以服
休命可

樂壽縣主可進封郡主

勅九族以和國家之懿二姓之好典冊攸重宜推茂恩
以相嘉禮某柔閑自立淑懿有成既在及笄之年將從
鳴鳳之兆蘋蘩修潔宜為婦順之光湯沐升榮更益封

君之號可

著作佐郎葉綱可祕書丞

勅某國家考課之令著于常典賞善罰否吾無所私爾文學起家慰薦遷秩求之以備不能無瑕俾增年勞蓋示國法命之叙進猶踐前言書云令出惟行不惟反此之謂也爾其恪勤無怠荷茲寵榮可

內殿承制劉懷懿可供備庫副使

勅國家稽式舊制叙進羣官有勞必錄無善不顯爾久

登仕路列于朝班莅事精勤老而益壯考其理最升遣
使聯賞在必行無忘祇荷可

又自副使改右衛將軍致仕

勅朕少而用其才老必賦其祿又遷其秩叙以優其退
閑具官某忠而能勤老且不懈邦國之奏績狀可稱嘉
其止足上還印綬俾從內司之重特升環衛之職勉荷
恩寵以遂休寧可

西東供奉官閤門祇候知順安軍焦宗慶可內

殿崇班

勅某國家制壇守守亭障欲其將卒偕練號令必行上
下相親動作相信詳擇材武以久其官以爾嘗領郡符
徙治軍壘習知備胡之術克勤御下之體大臣保任稱
之為能是用遷內朝之名品示邊城之委寄爾其謹烽
候完器備無貪功以生事無玩寇而輕守勉思樹立以
荷寵榮可

大理寺丞陸經可責授袁州別駕

勅某國家制刑之中率入于下俾其畏忌以自祇飭爾以詞學見稱列在臺閣不能淑慎賄交于民白簡奏彈覆驗明著宜從左謫以示常刑可

刑部員外郎集賢校理薛紳駕部員外郎王正已太常博士蔣安石殿中丞杜術閻革等轉官

勅某等國家設耳目之官按舉吏職分牧守之任宣導王風至於佐治一圻專董百里皆擇材士俟其成績而

寵嘉之以爾紳等器度和雅望實休懿咸以臺省美秩
出總庶務或埋輪而清列郡或分虎而守名邦或題輿
而著善聲或馴雉而彰異政集其歲課進以官聯予不
吝於恩榮宜各思於報效可

奏舉人前常州司理叅軍馬實可著作佐郎

勅某國家嚴資考之格廣薦延之路察於衆好冀獲翹
楚以爾久服官政勤蓋自飭庶獄審克郡無冤民章聞
于廷宜用升進罔怠所守以荷成命可

三班奉職王良臣可南京柘城縣尉

勅某丞尉之官其品雖卑而差用清流朱紫可別故儒素之士得之為榮爾本名家而補右職心苟不樂何能安人改佐百里茲為茂寵其謹奉家法無忝休命可

奏舉人前夔州錄事叅軍辛終吉可著作佐郎勅某國家分命天官專領選事外諸侯之舉尤異者必視其績狀而考進之朕親覽焉以加獎擢惟爾文辭登第廉謹宿官州縣勤勞備嘗之矣宜升清秩庸勸吏能

夫少而有志者老當益壯汝其勉之以蹈榮路可

著作佐郎何涉可祕書丞

勅某西賊俶擾自悔禍延安帥府能稱朝命以通其意
而卒來講和羌夷柔順邊鄙寧息爾之周才實參戎事
帥臣稱薦深所嘉尚苟得尤異而遷之不必累其歲月
求賢若渴朕甚慕焉宜堅爾誠以服榮命可

廣南西路提點刑獄虞部郎中李永德可金部

郎中

勅某夫天下獄訟多矣專付郡縣之吏則恐鬱滯而不伸盡俟朝廷之報又慮填委而為累必擇明察摠其綱領以爾嘗守一郡而寬猛得要俾察庶獄而按視必精果當厥職而民無怨讟結其成課升之左曹勉荷恩榮以副欽恤之意可

禮賓副使權環慶路鈐轄張建侯可洛苑副使勅某頃以策畧中缺號為材武故自關隴宿兵已來常使參之自偏裨升副貳摠專達悉由試可而上一言

謂之稱職今通遠缺守擇而委焉夫命郡守以臨民遣將臣而治軍分文武之任為戰守之備矧惟鳴沙極邊與羌戎接壤兼而付之固不輕矣升其使聯用示優寵可

奏舉人前昭信軍節度推官孫億可大理寺丞勅某國家自一命而上集于天官得資計考壓以例進必取薦延多者授之京秩爾以藝文來仕選升賓席必有嘉畫贊其善政露章稱導良用旌之勉守初節以荷

榮命可

亳州司馬崇正可供備庫使

勅某頃授任符兼臨劇部寇戎在境烽候不明帥府繩
違秋官議辟降從散秩用示深慈屬元祀告成萬物更
始宜推曠蕩以恤滯淹特改使聯勉荷皇澤可

武溪集卷十

欽定四庫全書薈要卷一萬四千二百六十六

集部

武溪集卷十一

宋 余靖 撰

制誥

樞密副使諫議大夫河北宣撫使富弼可加正
奉大夫輕車都尉仍賜推忠佐理功臣

勅朕昭事天地嚴配祖宗用祈洪休大庇黔首思與一
二輔佐同茲戢穀故䟽霈寵渥冠於羣倫具官某文窮
變貫學通古今論議忠正有濟世之才謀猷高遠有經

國之用不辭患難而夷險一心累避榮寵而退靜自守
繇是擢登宥密翊贊機衡咨綏遠附邇之能致同文同
軌之治朕方親執玉幣恭修燎燔而卿以撫循邊士不
在侍祠之列朕甚思之所宜賜以凌煙之號進以執珪
之秩疇其茂勲昭示異數忠之至者寵必厚汝其欽哉
可

端明殿學士兼侍讀學士給事中李淑可加上

護軍實封貳百戶

勅國家陽郊報本宗祏致嚴舉一歲之明禋受百神之

介福式均茂

缺

如邇臣某望著人表才稱國器博通

今古

缺

之術洞照天人精禋之源趨軒陛而持橐早

居清近侍帷幄而執經率多規益乃樂中和之職厭直
承明之廬出班詔條專領方面禮成敷佑罔有外內崇
其秩叙進其勲爵式表休命汝惟欽哉可

諫議大夫御史中丞王拱辰加勲

勅朕親執珪幣以事上帝升配祖考皆由舊章假爾近

臣相我元祀茂布王澤用均神休某才智少雙器識兼
遠首中藝文之選鬱為邦國之華頃在禁林而能潤色
鴻業嘗領京劇所以表則四方顧訪早知其國器糾正
用委於邦直會朝之次古稱獨坐之雄耳目所寄今為
中司之重咨栢臺之偉望贊觚壇之縟禮百神受職萬
國歡心式布受釐之渥以表同寅之寵

皇親率府已下

勅朕承七廟之鴻業荷二儀之並貺肇禋吉土對越明

靈稽式盛容誕布純佑休寵所被宗枝實先某等孝友
立身信厚成性並承詩禮之訓自敷名教之樂青宮列
衛式表茂親朱紱侍祠宜頒異數既廣蓂蕭之澤用昭
葛藟之恩公族之榮聿加勲賜

殿前都使已下

勅朕贊鬯世室升煙泰壇修親祠之儀遵陟配之典恭
承貺施大報靈祇思與帥臣均茲茂祉某等久服戎事
早登勇爵遙董親軍外固吾圉自西羌倍惠數歲不庭

雖戍兵未得脫甲而胡人不敢近塞繫爾善守倚如長
城在禋祀之辰當封疆之寄蓋重爪牙之託式加名服
之重

省副魚周詢等並加大夫階勲

省判
同詞

勅國家肅若舊典稱秩元祀吉土拜貺高煙達誠爰均
敷錫之祥不為專饗之美某等器識開敏資性端方咸
稱劇才佐我邦計經入有度展富國之謀均節有常得
足用之要唯匪頒之至廣皆贊成而知素宜崇勲賜用

寵勞能

上將軍致仕楊崇勲加食邑七百戶實封三百

戶

勅國家接千歲之統逆三神之釐禔燎薦信郊丘成禮
式均茂渥無忘老臣某逮事先朝休有令望積勤勞而
奉上歷中外而成績重率侍衛則忠謹足稱翊亮樞機
則良實可任亦嘗出領方面付以節旄用威戎夷咸所
倚賴早敦知止之分久從還政之樂明禋斯畢大賚有

加方念安車之寵宜益爰田之賦

大將軍防禦使蔡興已下至遥郡刺史等並加

食邑三百戶

勅國家接千歲之統逆三神之釐禋燎薦信郊丘成禮
式均茂渥惠逮爪牙某材武風成忠果可任少分戎政
則申嚴而有聞晚登環列則勤勞而不懈方資拱極之
重仍展陪祠之恪圖叙勞舊用疏恩寵

廂都指揮使已下

勅朕膺天地之貺荷宗廟之靈聿修至誠式舉元祀均
此介福及於具寮某等咸以武功統我二旅出授封疆
之寄入居宿衛之勤備彰智勇之資以當親信之任宜
膺寵渥勿怠肅祇

省府推判官

勅朕親享太室以展孝思對越上靈以嚴祠事天地竝
貺福祿攸同駿奔于庭宜均寵渥某等縉紳令望臺省
俊游或同經度之謀或副浩穰之政贊裸將而在列侍

紫燎而克勤錫以轉勲欽茲成命可

諸司副使已下至崇班

勅朕裸皂世室紫燎泰壇薦繼孝之誠嚴報本之祀馨
香上達明靈降鑒樂與從臣同此介福某等衆推美望
籍著內朝或趨軒陛而服勞或居屏翰而分寄駿奔在
列固夙夜之可嘉恪勤居外亦爪牙之所託咸進爵邑
用示恩榮可

贈太尉允寧女趙氏封縣君

勅朕親享太室嘉薦園壇上以承七廟之靈外以受百
神之職均此景福被于綿區矧惟宗枝宜豐優渥某人
女某等肅雍成性柔懿著聞頃緣棠棣之愛嘗蒙脂
澤之寵蘋蘩奉祀式耀華宗湯沐改封當殊異姓宜體
篤親之意無忘令族之恩可

右正言孫甫等加恩

勅朕尊事上穹升侑列聖誠意蠲潔明靈顧享翕受福
祉被于區域具官某等識理閎遠器量方正咸自衆多

之選綴于侍從之例或張旌而使絕域以修隣歡或分
虎而守鄉邦以便親養或以節促召而脂車在途雖阻
侍祠之肅豈忘均釐之典悉加勲賜以表予懷欽荷恩
榮更勵而節可

美人張氏父堯封贈祕書監可贈工部尚書

勅朕舉修元祀祇薦至誠裸獻宗祊柴望泰時祖考顧
享氣象休嘉欽荷純禧均布縣宇外惟百辟內則九嬪
悉推恩寵逮于存沒某人父某素履淳厚清節浚明深

蘊美才不登顯仕是生令淑入侍宮闈常自抑畏慎守
謙約退讓名品章明柔順嘉其遺德故用追褒俾由祕
府之華驟陟文昌之峻式頒明命用賁幽阡可

興平郡主等

勅敦叙九族糾合同姓皆詩書所傳政教之本矧樞燎
之成禮宜葛藟而伸恩興平郡主趙氏等雅性幽閒淑
懷信厚早被公宮之教既兼侯國之封顧柔良之有聞
惟肅雍而成則易之美地庶耀靈源

百官父在者

勅人之至行篤於天性國家之教常必先之父之貴重
則賞延於子子之通顯則尊及於父蓋所以敦三綱而
親萬國也某父某賢業自守家聲必聞詩言禮立克謹
厥訓聿傳弓冶之嗣服在簪紳之列朕方稱秩元祀懷
柔百神均此介福被于率土嘉其忠教綏以寵章式昭
肯構之賢以慶高門之祚可

母在者

勅古之賦祿貴於逮親雖居晉楚之富靡及雞豚之養
矧惟白華潔膳赤第侍祠西雖承命北堂拜賜國之善
教吾其捨諸某官母某氏德劭嬪風義高壺則克懋慈
闡之訓聿生閨籍之賢屬柴燎以修儀被蓼蕭而洒澤
庸錫丹駟之命以彰高閼之祉可

父亡者

勅父子天性其親一也朕躬執珪幣升侑祖宗蓋所以
報本崇祀奉先追孝簪組在列亦念其親宜推渙恩上

及先正某亡父某高節善行束修其身遺德餘懿垂烈
于後喜肯堂之令嗣霈漏泉之茂渥密章為賁壤樹之
光可

母亡者

勅朕贅鬯世室欽柴泰壇合享天地升配祖考備物牲
幣所以展奉先之誠䟽恩存沒所以廣顯親之孝某亡
母某氏言容著範禮訓傳家沼沚宣勤珮環有節果生
王國之彥久服朝家之寵宜因珪組之榮用追湯沐之

賜可

百官妻

勅夫家道正而天下治蓋國風之始人倫之大皆本于
夫婦也朕潔誠誌祀奉先追孝外修牲幣之薦內有染
盛之助翕受百祿敷錫四方樂與羣倫恩被伉儷某妻
某氏柔明著美淑茂流聲居無出閨之言動有鳴環之
節作嬪良士服我周行宜開石窀之封以寵金閨之籍
俾其齊家輔國有所先後則庶幾乎治矣

王相公贈官

勅朕躬執珪幣升侑祖宗蓋所以報本崇祀奉先追孝
簪組在列亦念其親宜推茂恩上及先正某父某邦國
元老經綸嫩材毗贊冲人燮調至化內修百度外撫四
夷豐功格天遺愛在物厥有善繼齒于朝序用疏泉壤
之澤追錫天臺之寵密章為賁幽宍之光可

工部侍郎叅知政事陳執中三代

曾祖嵩贈太子太傅宜特贈太傅

勅國家疏爵而尊賢稱情而制禮其德懋者其位顯其
任重者其數優體貌之臣式叅柄用褒賁之禮宜及曾
闡某官曾祖某令望浚明雅懷冲曠含章不伐積善有
開貽厥孫謀弼我朝政錄其先範式佇遠猷俾從儲宗
之榮超居帝傳之重下光泉戶庸顯世勞可

曾祖母黃氏贈郢國太夫人

勅國家升用輔臣褒崇先正所以展子孫之志示朝廷
之光昭起國封用賁嬪則某官曾祖母黃氏徽柔植性

淑懿流聲服圖史以增華布言容而成訓綽著可嘉之
美果膺有後之祥贊台鼎之崇上恢祖闕錫山河之賦
式耀泉局

曾祖母黃氏追封德陽郡太夫人

勅朕圖任舊臣共政期致于治追賁及於三世以旌其
遺懿餘烈之有紹也某官曾祖母某氏作嬪茂族亲明
著聞閨閫之則人以為訓福不在其身而在其後厥有
俊傑用勵翼于皇家欲其輔朕以紹文考之耿光故顯

其祖之配而啓之國逝者其鑒茲可

祖光嗣太傅遷太師

勅夫德之所積其流必廣善之所鍾其後必大故挹其
流者知其源用其後者顯其祖此國家訓人之道臣子
興宗之美也某官祖某五代之季養志丘樊榮利內恬
羽儀外戢位不充於當世福乃流於後昆子舍稱賢先
朝倚之為棟幹孫謀襲美冲人用之為股肱頃貳樞庭
已彰懋績叅持國柄再佇明謨爰念世勞用推祖閥大

門之懿奕葉可稱俾繇帝傳之崇式進師臣之秩漏泉
垂澤聿備徽章可

祖母孫氏贈安國太夫人

勅慎簡賢佐上所以緝寧邦家追崇祖室下所以申順
情禮家聲克劭閭則攸先某官祖母某氏柔嘉秉德幽
閒成性珩璜中節蘋藻敦風克垂燕翼之謨篤生弼諧
之哲福既宜其家室澤宜滲於泉壤誕啓土宇用賁松
楸可

父恕太師中書令尚書令榮國公改封許國公

勅昔鄭武公父子並為周司徒天子有袞服之賜詩人
著緇衣之詠蓋預執國柄號為世官古難其人今得良
佐美其子而追褒其父亦古之制也某官父某亮節致
君周才應物事我烈祖鬱為名卿總邦計而經入有章
贊宰司而裁成無外粵有令器克紹先基吾欲使天下
知才臣之子復叅大政故以節召還而共邦事嘉其善
述之志用霈流根之澤可

母李氏贈崇國太夫人

勅國家之制同體莫重於股肱人子之心揚名以顯其
父母朕所倚注義有褒崇某官母某氏生自德門嬪于
邦彥淑靈著詠宜家室而浸昌聖善流稱穆閨闈而有
翼我有良輔爾之令人式昭駿嘏之賢本自斷機之教
加之象服用飾幽泉可

母王氏贈鄂國太夫人

勅夫能擇其臣者君之明能顯其親者子之孝摠是二

美朕所冀焉某官母某氏節茂采蘋德昭流行夙彰婦
順克振閨風是生俊良為予輔弼爰洒漏泉之澤用表
宜家之賢寵以副笄光于幽窆可

皇后曾祖太師尚書令兼中書令追封魯國公

曹芸可追封

闕國公

勅朕接千歲之統逆三神之釐致孝克享亶誠昭薦馨
香上達明靈降鑒渙發大號被于四方荷祖宗之休成
吉蠲之禮粢盛之潔實惟內助欽其遺懿宜示追褒皇

后曾祖某稟常山之英負全趙之勁雖羽儀未展而堂
構聿隆篤生元勲事予藝祖豐功在物茂德庇人肆惟
眇躬得是天合嘗極人臣之贈用昭肺腑之榮更徙大
國之封以為中宮之寵可

曾祖母追封陳國太夫人張氏可國太夫人

勅朕合祭天地升配祖宗四海來助百神咸秩翕受介
祉敷錫庶邦重念夫源之深者其流必長德之積者所
憑必厚朕既恭執鬯瓚上奉七世而中宮敵體以母天

下肆其褒贈之典宜及曾闡俾其三廟異室同榮合配
茲惟享國之樂行古之道也某氏毓德貴門作嬪令族
能謹卜隣之教以成興宗之福俛天作合實荷遺懿滲
泉流澤庸均茂渥徙封湯沐垂耀泉途可

父贈開府儀同三司太師兼中書令曹玘可贈
尚書令

勅朕承七廟之重守億年之基奉順先猷欽舉元祀裸
獻宗祏禋燎圜壇三神垂禧百禮咸秩大均霈澤被于

綿區矧惟中宮之尊內治所主固宜同茲介福光于外
宗思美周姜之儀庸表塗山之盛皇后父某積德至厚
含章特立生自元勲之門專於儒者之行摘光令族坦
夷曠之懷握蘭華省抗令終之節雖當世不顯而流福
無窮覩天發祥嬪虞作合奉祖宗之祀共罄純誠荷天
地之休實繫遺烈式崇褒賁用企儀刑俾自龍池之榮
更茂天臺之秩庶光壤樹式耀桂宮可

母贈吳國太夫人馮氏可國太夫人

勅朕贊鬯清廟欽柴泰壇精誠備至神明昭格而又恭
發謚冊追奉閼宮上遵建隆之典聿同章聖之懿孝思
克展祠事有嚴還御端闈渙發大號受天百祿敷佑四
方眷言內助同茲茂祉等其立愛之念頒此顯親之榮
某氏積善有開含華不耀自守珩璜之節克謹葛覃之
訓采蘋之職遺範於華宗夢月之祥有歸於禁掖爰布
漏泉之澤用展結褵之思式加象服之儀聿重閨門之
賁可

德妃沈氏曾祖升贈太師宜特贈尚書令

勅朕丕承洪緒稱秩舊章羞潔粢盛親享清廟贊奠珪
幣祗薦柴壇神靈降格福祉休應思與率土同此純禧
外庭搢紳朕之輔佐咸布寵澤被於存亡矧惟先朝妃
御協宣陰化宜有恩榮逮于祖禰某官純誠格物懿行
聞時聿生柱石之賢以為廊廟之用積德至厚流福無
涯肆惟曾孫實叅內職荐被密章之寵彌增壤樹之光
宜加三獨之榮以示六官之美可

曾祖母追封燕國太夫人華氏宜封國太夫人
勅朕親享太室展追養繼孝之誠祔祀圜丘成報本反
始之禮精意所感繁祉來同內外職司恩渥咸被某曾
祖母某氏婦順修飭母道嚴明聿生佐命之賢以濟奕
世之美調鼎之彥已顯於廟堂采繁之範更流於宮掖
今以雀釵之貴薦加象服之榮推此恩華共光存沒可
祖贈太師尚書令冀王倫宜特贈兼中書令

勅朕嗣守丕業奉順先猷三歲一郊百神受職芬芳上

達明靈降休式敷純嘏浹于區域恩被于遠當由近始
澤浸于外必自內均某祖某以廊廟之才逢風雲之會
功在彛鼎位登台衡厥有令孫備職先朝坐論婦禮有
光彤管因此視卿之秩嘗啓真王之封宜兼雞樹之榮
更耀密章之賜可

祖母追封秦國太夫人田氏

勅朕純孝以奉于先廟精意以事于圓穹裸獻必虔燔
燎惟謹而天地並貺神靈降休致函夏之大寧荷文考

之成烈羣后追同於謚號貴嬪當優其情禮褒賁祖妣
舊有典章某氏早流淑聲作合元宰陰德至廣後嗣其
昌肆惟宮闈得彼恭懿彤管之職為式掖廷副笄之榮
宜均逝者可

父繼宗贈兵部尚書宜特贈

勅朕昭事上帝懷柔百神繼孝宗祐薦誠吉士仰荷純
祐爰霑茂恩內外之職存亡被澤某名臣之子賢行著
聞早垂紳而立朝嘗象河而命秩粵有令淑備于嬪嬙

祇事先朝協贊內職肆惟追賁殊于外庭宜進天臺之
班式為泉壤之耀可

母追封福昌縣太君吳氏宜特追封

勅朕世室執鬯泰壇升煙昭薦至誠以荷並貺誕布德
澤均被幅員眷惟掖廷宜同介福某母某氏淑靈素著
聖善有聞家庭甚嚴子姓蒙順選納之盛邁于先朝褒
賁之崇屢光幽夢茂恩所及營魂有知可

樞密王太尉三代

曾祖建福贈太師中書令可贈兼尚書令餘如故

勅朕親享七廟昭事上靈牲玉備具粢盛豐潔百神咸秩二儀以和嘉與率土同茲介祉眷惟俊傑叅掌樞務能緝熙於庶政宜褒賁於遙源具官曾祖某秉德有經含華內照不希當世之譽克集高閼之福皇家啓運嘗得佐命之勲耿躬繼統更獲同寅之輔屬嘉壇之已事均惠渥以無垠宜因右省之崇兼進中臺之秩錫茲明

命式耀幽阡可

曾祖母追封魏國太夫人賈氏可追封國太夫人

勅朕躬款宗祏祗薦靈壇三神以和百禮咸秩誕受禧祉均被臣鄰矧惟輔弼之聯素展忠勤之效宜示便繁之數追賁曾高之室某曾祖母某氏言容有則宗姻為範卜鄰傳芳早勤胎教斷織成訓聿光彤史福善所積源流必長垂休後昆再世為輔人本其祖澤流于根更

開大國之封以為令族之耀可

祖祚贈太師中書令兼尚書令可追封國公

勅朕清廟奉先柴壇薦信天明地察展以昭事之儀祖
德宗功叙于陟配之典肆類成禮百神垂休發為霈澤
被于函夏樞近之職寵數宜隆某祖某懿範閎遠素行
夷曠愷悌之政存乎風謠鼓鼙之勲著在方冊末年冲
退脫迹寵榮世生忠賢為國輔弼閔閔相繼邦家所毗
嘉孫謨之有成增公爵之攸重可

祖母追封陳國太夫人嚴氏可追封國太夫人
勅朕祇薦祖宗合享天地精誠上達神靈來顧含生之
倫罔不蒙澤某官祖母某氏德芳蘭芷行潔冰玉女儀
修飭母道嚴明肆惟令孫克奉慈訓對掌機軸備悉忠
誠追述遺懿用增恤典蓼蕭之澤泉壤為光可

父溥贈尚書令兼中書令追封魯國公可贈太
師

勅朕嗣保丕基奉順舊典致誠恤祀尊祖配天四海駿

奔三神純佑誕布霈澤被及中區矧惟參典機衡陟降
左右因予繼孝之志特厚顯親之榮某父某佐命元勲
興邦碩老經綸王業勤勞我家翼贊竭其股肱締構同
於柱石雲龍胥會寰海具瞻功格皇天德垂後裔肆惟
令嗣輔予冲人祇畏一心贊襄萬務陪祠展肅追遠均
恩宜因國爵之榮更益帝師之重可

母追封齊國太夫人常氏可追封國太夫人

勅朕統承鴻祚稱秩明禋親享七室升侑列聖嚴恭寅

畏克終祀事歛時百祿敷錫兆民嘉與輔臣共蒙繁祉
某母某氏柔明著美淑茂流聲從婦順而有融鑒女圖
而成德聿昭慈訓克懋閨風勗子舍以能賢被國恩而
為耀再加象服式賁松壚可

母追封丹陽郡太夫人申氏可追封國太夫人
勅朕齋明卹祀祗祓薦誠親陟靈壇恭奠嘉玉百神望
秩四海駿奔推此介福發為大號粵惟良輔宜先茂恩
某母某氏託質華族作嬪良士德有春蘅之分行含秋

霜之潔聖善之福克昌厥後式嘉肯堂之嗣庸洒漏泉
之澤可

兄貽正贈太師可贈中書令

勅朕祇脩裸鬯躬執珪幣至誠蠲潔上帝顧臨九州駿
奔萬國嘉靖思與臣庶同茲休祉矧以國婚之重宜廣
天倫之愛某兄某名臣之子素行自飾早登赤韎之士
尤號白眉之良功昭于時位不充量屢推恤典以寵華
宗庸為戚里之榮亦表相門之美增崇西省式賁京原

可

嫂追封鉅鹿郡太夫人魏氏可追封郡太夫人
勅朕親款祔室恭陟泰壇昭薦至誠用伸美報翁受景
貺均彼函宇眷惟輔政之臣當厚元宗之寵某嫂某氏
幽閒飾性柔懿流聲宜家室而有歸訓閨門而允穆粦
有賢傑贊予樞機庸啓郡圻之封以表天姻之重丹駟
增賁窀穸為光

富副樞三代

曾祖處謙贈太子少保可贈太子太保

勅朕款七世之廟以展孝思陟八觚之壇以嚴祀典神
靈昭格福應休嘉荷天之祿敷祐于下惟時邦傑協宣
機政克奮同寅之力聿成共濟之美庸褒先範宜渙茂
恩具官某曾祖某擢光內融含德獨秀動為禮義之表
居為丘園之貢藹流令則實生懿孫皆憑曩基用成遠
器蓋示遙源之寵追升儲傳之華賁此幽泉用昭榮祚
可

曾祖母追封彭城郡太夫人劉氏可追封陳留

郡太夫人

勅朕親執鬯瓚祗薦牲玉蠲潔至誠昭示大報九州率
職不為獨恭百神降祉靡敢專饗嘉與良輔同此純休
具官某曾祖母劉氏家有表儀動循禮訓珩璜中節沼
沚宣勤源流深長福祚繁衍是生俊傑為朕股肱宜因
國棟之憑再錫郡封之寵式彰遺訓垂耀幽阡可

祖令荀贈太子少傅可特贈太子太傅

勅朕奉祖宗之謨承天地之貺修崇元祀用昭美報翕
受景福敷錫庶邦輔佐之臣名禮當厚推恩及於祖禰
同德均其誠孝具官某祖某懿行絕俗精識鈞深天生
忠厚之資家襲義方之訓克茂世閥聿成孫謀參處機
衡之重時惟廟社之福嘉是遺懿宜推茂寵俾從三少
之選超登二傳之崇下飾泉扃用隆褒典

祖母追封金城郡太夫人趙氏可追封南陽郡

太夫人

勅朕純孝以事宗祧精意以享天地芬芳上達肸鬯下
臨歆承洪休渙發大號爰均追遠之澤庸廣奉先之禮
具官某祖母趙氏閨壺著範宗嫔為則婦順自飭慈誨
有成訓彰圖史福流後裔再賁丹輶之寵用昭幽宥之
光可

父言贈太子少師可特贈太子太師

勅朕昭孝薦誠報本崇祀執瓚世室升煙泰壇馨香遠
聞靈祇克享萬國嘉靖庶物繁撫實荷神貺救寧縣區

斯皆輔佐協恭夙夜宣力共致至治洽于飛沉宜推茂
恩兼被存沒樞密副使富某父某識度周物文敏起家
名高邦伯之政職重郎曹之選位不充量福流後昆粵
生柱石之材克成廊廟之器庸嘉許國之愿實本教忠
之德再優恤典式顯世勞可

武溪集卷十一

欽定四庫全書薈要卷一萬四千二百六十七

集部

武溪集卷十二

宋 余靖 撰

判詞

甲為學官教國子以六藝或譏其藝成而下不
伏

立身之道雖鄙異端進學之方必資善教蓋嚴師而育
益豈執藝以同譏甲德比珪璋才堪模範東序上庠之
地素號人師五禮六樂之文敢忘國典至於和容執轡

夙著彝章會意差分悉有成訓咸資博諭式勵多能何
哉或者之談罔識先儒之道且夫治民安上不專於揖
讓周旋易俗移風可以察存亡治亂習于褻尺爰標選
士之規舞彼交衢再紀鳴鑾之節偃波成字取法於奎
躔回筓窮微能知於府實安可比之賤技固當勵彼兼
才鄙事自謙雖聞尼父之語嘉猷可採盍遵保氏之儀
固難詰以他規宜見嘉於善誘

乙為太常請復鄉飲酒御史以為其禮久廢不

可復行

教民以禮誠欲從時觀鄉有儀豈妨行古將舉治邦之
典必先幾聖之謀况乎事著前修議非獨見太常以禮
存沿革請頒尚齒之儀御史云政貴因循難復興賢之
制雖是非之互列在黑白以宜分順彼世機豈五禮之
必廢知其王道亦三代之可追何則舊典攸存鴻儀具
舉賓主取象於天地長幼以倫介僎立法於陰陽登降
有數俾其成俗可以制中三揖而后升所期教讓五十

者立侍式冀明尊匪獨揚觶以為容抑亦薦能而垂範
嚴凝溫厚體仁義而有經西北東南正衽席而無亂式
稽典故誠可遵行請從宗伯之言庶協先王之訓

丙為大夫浣衣濯冠以朝或譏其隘辭云儉德
之恭也

車服有章誠難偏下衣冠無僭當許謹身在全德而或
虧於常情而何過丙也名先淑慎志謝紛華趨表著以
思恭方期率勵服浣濯而從儉式誠奢淫蓋質樸而自

居奚固陋而相罪且三梁垂製用辨於尊卑百襲矜豪
未慙於侈汰所期見偉何乃云非貴而能貧嘗覩子張
之戒富而好禮式遵尼父之謀俾有節於身章寧妄加
於首飾平津布被誠或慮其矯誣子臧鵠冠終亦招於
禍敗蓋俗奢而示儉非詐善而近名忘九儀之有差信
一節之可尚雖義存戴禮狐裘為卿佐之譏而詩美周
南葛覃有后妃之化式昭恭德無愧前脩

丁盛服謁使者門下令其解劔辭云劔者君子

武備不可解

皇華宣命雖喜登門武備飾身寧宜解劔必許兼人之
勇難從索客之言丁也修謁駟車入趨牆仞仰其符采
未逢躡履之迎佩彼干將遂致解衣之拒過旣彰於下
吏禮將闕於上賓揖讓未修侮慢可恥且繡衣美秩誠
欲尊崇而玉具盛容難輕去就所宜與進胡莫肄儀雖
列郡宣風漢守布佩牛之化況公門異禮魯人有脫褱
之嫌事苟失於典彛義寧甘於進退代逢吳子專諸或

止於膝行名重霍光蕭傳亦羞於露索固當從俗奚獨
亂常持斧自矜暴勝之既聞失節撫齋無苟雋不疑終
亦抗辭勿疑披露之心在煥干星之彩

戊為御史大夫泣封具獄或譏其過

黃沙具獄雖貴哀矜丹筆正刑何煩感泣苟原心而無
濫諒承睫以胡為戊名冠駕行任隆烏府國章明啟每
色聽而得情奏草初成必面封而流淚詳觀所履未協
大中何則自速其辜人既彰於凶德不失有罪法但誠

於深文儻能察必無冤何用痛其不免且明德慎罰雖存審克之規而議獄緩死豈有漣洳之象况自專於決讞亦可辨其重輕若徽纆之妄施雖涕洟而何益惠姦有意所謂婦人之仁疾惡無私宜慙君子之器但可精於慎惻固應絕彼放紛悲對室家盛吉未為得義哀生棘木張敞無乃近名將示小慈終虧大體

甲為京尹耕者讓畔行者異路或云無益

威嚴御下誠曰有權禮讓移風孰云無益雖浩穰之難

理惟漸染而克成甲以德服人所居必化大田千耦咸
敦讓畔之誠廣陌三條盡識異途之教式期成俗非欲
邀名何乃或人旁生橫議且仁政必始於經界自協和
平善教不爭於醜夷爰資誘導治可孚於繩木事且異
於米鹽學校如林旣飛聲於蜀郡羔豚去飾嘗闡化於
中都實倉廩而有知奉詔條而無失岐山布德遂俊虞
芮之心馮翊推誠終息弟兄之訟咸裨治體綽著民彝
必世後仁備聞往牒一國興讓寧愧前修豈唯知稼穡

之難不復競險易之利但可勵其謙退無宜督以科繩
黃霸雖已失中張敞未為知義

乙為刺史薦門下吏或以為當得山澤隱滯辭
云山澤不必有異士

擇賢而任誠恤滯淹惟才是求何必幽隱但器能而可
採豈邁軸以為先乙束帶立朝剖符出守心既精於求
瘼道固協於援能千騎長人任且隆於藩翰百石補吏
器不問於山林爰推體國之忠允協知人之善豈資遺

逸方俟甄收且風鑒旣精文子或陞於管庫官聯苟序
衛青猶奮於庸奴所貴立賢無方庶協適時之用戔戔
之帛徒欲責於丘園森森之材自可擇其翹楚吳祐嘗
交於小吏夷吾亦舉於僻游採彼虛名盧毓終羞於畫
餅取其大節鄭詩無棄於採葑奚必紉蘭之人方令推
轂而仕雖魯儒言教當舉於逸民而漢守援賢止求於
佳器式諧舉類無或執迷

丙越度官府垣籬官司罪之辭云隨甲而往

協謀抵禁法有減論冒度干刑理無從坐既投足而同
往豈原心而或殊丙德之弗修動而有悔不如已者方
踰數仞之牆因而從之遂罹三尺之法自疎明慎猶啟
薄言况穴隙以相從惟蕝茨而是履前王著令徒攀共
犯之條君子嚮儒盍守獨行之節矧府寺之攸設惟藩
屏而是崇不得其門同臨蔽惡之地必求諸道當慙由
徑之非雖曰比之匪人實亦動而過則原其發慮遽云
職汝之由詳彼治躬豈可効人之僻咎將誰執戚實已

招視籬落之具存當跬步而為過別冒漢家之網或異
首科自絕蒲人之祛諒難降等三千之條備紀七十之
杖何逃罪必甘心詞奚苦訴

甲私行入驛驛官拒之辭云職事五品以上

出非君命難入息於野廬名重官聯當即安於公館旣
紆朱而表貴雖按轡以何傷甲錫爵王朝改轅私役各
司其局張旌且異於輜輶駕言出遊秣馬遂登於館舍
何哉主吏罔識彝儀况銀章之自崇豈金車而見困地

分亭堠亦旣高其閑閼位列簪纓焉可止于逆旅官已
差其品秩人合辨於尊卑伯宗之傳弗乘誠難假道子
產之垣未毀姑可安身必體置郵之規且殊授粲之費
漢朝典故自存予告之條周卿職司宜謹守涂之役豈
謂治其家事即欲異於王人不遑寧居駟牡雖非於驛
騎各有攸處一宿當就於遽廬但可容其寢興無或給
其委積式符唐令勿亂周行

辛捕罪人丁過而不救辭云家有急事救療

逋播未擒宜同掩襲彌留待救安可遽迴苟或責其容
姦姑合先於拯患辛事當祇役職在追逃力而拘之飢
鷹之効未展勢不足者困獸之鬪方勞眷彼逋塗之人
式冀執兵之助備其越逸此望惠然肯來憂在族姻彼
乃往而不返誠或慮其飾詐諒合原其執心網恐漏於
吞舟固宜并力病方深於易簣安得忘情徒欲詰其圖
全未可罪其為已囚其亡命雖追捕以攸先人各有親
當患難而自救縱云行邁殊匪坐觀逋逃之黨未除遽

令謫我瞑眩之求不濟則欲怒誰職且異於追胥罰難加於行路是則彼有詞矣姑合宥而捨之

甲建議請依漢舉孝弟力田者復其身難者以爲古今不同恐生僥倖

行著閨門固宜勵俗力勤畎畝未可興賢將施復算之科當舉酌中之典甲學雖博古識未知今徒謬鑿其說聞遂堅陳於白奏以謂教先三德必求鄉黨之揚名地給百廛宜察井廬之懋力垂為科制視彼賢愚苟能傑

於等夷則使蠲其征賦未臻其極夫豈無詞何則魯分
德行之科誠為選衆秦急耕戰之務乃俾復身事雖著
於典章理或資於沿革謹循陔之養自可旌門富連阡
之田寧容減算愷悌有移風之益胼胝乃潤屋之常徒
欲勉其劭農烏得比其抱義賢者貴者周官弛力而有
經或耔或耘漢制免徭而為濫但可察其高節禁彼惰
游且負甲能趨魏氏雖寬於一卒維桑念舊世祖猶惜
於十年庶誕協於布常難兼行於優復

乙以贓抵罪至死丙與之聯事哀其母老詣獄
自陳與乙同受欲減其死有司不許曰吾不
於狀外案事

交游重義當濟急難獄犴貴情奚輕糾劾雖欲許其排
患固宜執彼受中乙也行乃辱先官非詔德冰壺失檢
將書伏鑕之刑綵衣承顏遂廢循陔之侍眷言益友遽
啟嘉謀自引姦贓蓋欲令其緩死相先爵位曾不顧於
危身慎測言機宜敦治體官曹聯事雖嚴相坐之條吏

局蔑私當察獨行之志本殊共犯寧信自誣養闕北堂
誠憂其待盡議專丹筆難濫於非辜爾雖重於金蘭我
豈輕於徽纆梟鷙並翼縱未革音玉石同焚恐為傷善
所宜理奪安取面從君子結交義徒深於刎頸前王著
律罪固在於原心無聽憑虛庶諧閱實

丙嘗與丁有舊亡命抵丁不遇丁弟戊年幼因
留舍之及事泄有司收丁戊送獄戊曰保納
舍藏者我也丁曰彼來求我非弟之罪州縣

不能決遂上讞之

罪因容隱即坐藏亡詞苟逮連先科率下當責正家之道庶諧治國之風丙砥礪自乖廉隅靡慎動旣罹於漢網滅耳堪憂逸遂同於楚囚脫身有計始求舊而無遇俄菟慝而有歸旋聞欲蓋而彰彼皆不愛其死丁以漏魚見詰情本締交戊以題鳳未逢罪歸隱惡各感遺身之分競推約法之宜雖義重鵠原將讓生於季弟而令行漢帝終報重於元昆式協事機庶諧刑典胡為州縣

之讞罔達朝廷之規且曰為兄之難須從任長之律叔
段不弟鄭伯有失教之譏文舉保奸孔褒當隱賊之坐
况云年幼宜協律文

甲建議請依古法置銅虎符給郡守每當發兵
遣使者至郡合符符合乃聽受之所以慎重
戎事難者以為其法久廢行之無益

事重幾微雖崇使節時逢開泰焉用兵符志徒務於經
邦理何忘於觀變甲也自矜博識罔達嘉猷以為千里

宣風旣共憑於熊軾六韜董衆請復頌以虎符冀皇華
之或臨俾軍興而無妄詳觀獨見恐泥舊章右一左三
誠則重其戎事先庚後甲亦將順彼民風苟專金革之
容將異詩書之敬且靈臺師節況當舞羽之朝豈英蕩
使威獨啟握兵之用在古今之異代豈沿襲而一貫司
馬以牙璋起旅式紀周官會稽以髦節興師終乖漢制
矧茲凶器安露沉機且發即堪憂世祖嘗云於鬢白雖
合而為信晉鄙未免於心欺徒事危言殊非利旨

丁為別將遇敵強不戰而退主帥責其異愼之
罪丁不伏曰見可而進知難而退軍之善政
也

陷堅却敵雖期必克全師保勝則貴知權苟免喪雄之
羞難責臨戎之略丁建牙裨校賜戟別屯提虎旅以先
登達豹韜之妙識裹糧坐甲雖有奪人之心高壘固軍
誠在知難而退胡為主帥自昧機鈴徒謂恥於交綏曾
未得於多算且夫什則圍而倍則戰著自前聞小敵堅

而大敵擒存諸嘉話豈輕備禦自取覆亡鋒不可當爾
雖慙於避銳寇無所掠我未爽於知兵所期量力而行
寧妨觀釁而動有進無退誠或譏其逗留鞠旅陳師合
先明於勝負鬪雖同於困獸慮宜盡於前茅自全必勝
之名孰致非夫之誚楚稱六間徒聞卻至之言晉全三
軍合採藥書之策勢使然也人其謂何

乙為國將其兄嘗為敵人丙所烹後丙敗來降
其國君勅乙曰丙即至人馬從者敢搖動者

致族夷乙曰兄弟之讐不反兵

亢宗私室有怨寧忘受命王朝雖讎必捨苟避嫌於虐
我將取誚於非忠乙志篤弟恭名高將種昔多患難痛
斷手於兇人今旣平寧覩束身於皇化俄屢承於君令
俾無復於仇家奉以周旋難乎進退執兵待報嘗悲列
鼎之烹牽羊旣來難背如綸之旨縱高義之所在當首
忠規苟釋憾之弗遑未足為禍若廢命而不稟何以事
君徒結戀於天倫宜推誠於國體懿伯之忌出境尚握

節而避之酈商之仇入朝難枕戈而殺也必資大順無
或固違史駢之言旣得之矣子夏之問不其然乎式遵
事主之宜奚取徇私之節

丙建議以為使吏任子弟率皆驕驚不達古今
宜明選求賢除任子之令難者曰諸侯繼世
以象賢仕者世祿以延賞古之道也

任子有經雖憂濫進擇才而用寧廢賞延事當協於大
中理難從於偏執丙嘉謹自許橫議聿陳謂公族之非

良殊乖德舉請吏能之必審當以言揚恐膏梁之易驕
鄙閥閱而無取未臻治本將昧邦經苟天爵之自修雖
代祿而何害鮮克由禮誠多侈汰之虞無忝所生亦有
恪恭之著故景升之室狔犬貽羞安石之庭芝蘭擢秀
儻令盡棄無乃深文在乎糾以庠序之儀謹其詩禮之
教勵官箴而黜惡肅政經而勸善叔向龍蛇之禍罰而
不私蘇瓌柱石之材用而無廢必若器業之可採豈以
門地而見遺周著象賢之規漢布推恩之典自存姬旦

之法奚苦王吉之言勿棄采葑式符刈楚

乙為給事中制勅有不可者遂於黃勅後批之
吏曰宜別連白紙乙曰別以白紙乃是文狀
豈曰批勅耶有司劾以非事君之道無人臣
之禮

事協謀猷固宜將順職居封駁安可依違若毫釐之有
差在彌縫而必正苟責事君之禮盍先體國之誠乙才
可兼人位未充量青瑣要務既踐夕郎之班黃紙除書

或塗兼相之字庶昭骨鯁以備箴規初啟紫泥之封未
敢奉詔若連白狀之尾不如無書雖天語之已宣在朝
論之必振慎其出令誠無反汗之期勤於獻可奚懼犯
顏之責儻從吏議恐昧國經且王言如絲自存於綱紀
而臣心若水那効於脂韋異詭隨而自居豈忠亮而為
罪漢代或旌於肅奉唐家亦美於封還哭李谿之白麻
誠為沮事批叔翰之黃勅難廢泣官當許直臣無拘局
節

甲為亳州刺史州境有羣賊剽人廬舍劫奪貨財累政不能擒捕甲潛設機謀悉知賊之巢穴乃起兵盡誅斬之廉使責其不先啟聞劾以擅興之罪甲曰翦賊除兇間不容息若須啟報恐失機宜

政宣列土專命非忠師如疾雷擒姦貴速必重解紛之誠寧貽動衆之譏况乎職在宣風民未安堵眷彼萑蒲之黨方恣攷敷揚乎桴鼓之威宜先勦絕胡為執政曾

未協心刺史以戰得廟謨進宜耀於貔虎廉使以兵稱
凶器動必待於絲綸彼雖虞於擅興此已成於拙速且
株徒旣歿尚曰時予之辜儻滋蔓難除抑亦是誰之過
責其制變恐未知權待越客而操舟何能拯溺白大人
而救火應已焦頭苟協機宜難料專輒死或枉於金革
不俟君言事苟利於國家豈虧臣節式顯發姦之志當
許幹時之策蒼鷹將逐於鳥雀武怒可嘉疎網未漏於
鯨鯢刑章斯得害旣除於惡馬理無取於亂繩不得已

而用之此宜無罪嘗學斷斯獄矣人豈有非

舊制戶絕田土皆没入官丙建議請給與見佃
人難者以為戶絕之家悉是鰥寡孤獨若給
與見佃之人佃人利其土田恐生窺伺枉害
人命

土均三壤素號於王田人謝九泉豈私於民惠况乎名
編生齒賦取食毛全歸方歎於天窮莫諧嗣續籍没式
頒於戶令用絕覲覲重為典章多歷年所建議以國不

言利請散於族姻難者以人皆有貪恐生於僥倖雖是非之互舉在萌漸以宜防原隰丘陵既厚連阡之入鰥寡孤獨寧無寘堇之虞儻富貴之可圖諒姦詐之必啟兼子旗之室嘗聞立宰之嫌破石崇之家亦切利財之歎遂令游惰之輩悉生窺伺之心非大猷之是經曾小惠之未徧且周公垂法自存井牧之規豈伯道無兒却為鄰里之喜舊章可舉新意難從

乙領選部舉丙為吏議者以丙父得罪不許辭

云罪不相及

錯薪求治舉必擇材寘棘施刑罰寧及嗣用蓋資於俊
乂法何取於繁苛乙位列天官識高風鑒再擢逸羣之
俊爰敦舉善之方教缺家肥人雖憂其肖父罪非孥戮
理未廢於興賢當國器而是求豈門閥而見棄仲弓積
行嘗覩犁牛之嗟大禹立功寧坐羽山之黜何謂從其
類也固合取其節焉拔茅必協於彙征雖聞選衆採菲
苟遺於下體無乃失人若堂構而是思恐輪轅之未盡

饁田秉禮當成卻缺之名伏鎖就刑豈傷嵇紹之舉奚
宜棄我盍許援能雖黨錮逮連漢代嘗聞於廢族而網
羅遺逸周人弗絕於起家宜詢子也之良無糾父兮之
惡

甲未冠而戰死里尹欲以殤禮葬之鄉師不許
未加冠弁禮雖下於成人能奮干戈義必旌於死國謀
且高於出類制寧拘於襲常甲勇畧自居軍鋒甚銳箠
廟門而加布尚邈冠期歌虞殯以擐旗願先戎事志方

堅於血刃身遂陷於膏原里尹以年在佩觿當從降服鄉師以力能衛社難減遣車各執是非之心互有異同之論若童心未變當從厭祭之儀況士節可嘉宜徇旌賢之議短長斯見用捨何疑敝無存之先登葬猶加等陳子行之即敵死乃盡忠豈待請醴之期欲削成墳之制周公舊訓雖有祭宗之文尼父嘉談嘗著勿殤之義能存馬援之志勿貶童汪之容

丙獨居一室夜暴風雨鄰婦室壞趨而託焉丙

閉戶不納或譏其不仁

急難相救里仁姑務於恤鄰居處必莊君子不忘乎慎
獨雖幸災而是懼當欺暗以為虞丙也儼若攸思塊然
危坐謹爾容於異室偶天變於中宵莒婦興嗟梁木其
壞魯人守節風雨不渝徒歛扉而見投終閉門而弗納
窮來歸我任潔志於冰霜人而無儀恐致嫌於瓜李蓋
期乎率履不越豈忘於惻隱之心且女子有行夜必思
於秉燭而賢人之德疑亦戒於拾塵况乎大欲存焉曷


可苟而已矣援之以手旣異子輿之權嫗不逮門難敷
展禽之可當杜未然之謗宜旌不亂之言責以羣居慮
非達理

乙名譽不聞或責之辭云友之罪也

道貫五常雖資力行譽流四表必假友生旣兼該而有
成在揄揚而乃顯乙智高博古學富知今鼓篴師門肆
鑽研而自得斷金交態掩聲稱以無聞遽興或者之譏
實自良朋之過且王陽筮仕古人嘗喜於彈冠朱博知

名當代共推於結綬探蹟旣勤於道術嚶鳴寧忘於奮
飛削牘三千媒銜雖能延譽寓言十九吹噓誰不因人
學苟廢於修辭固宜罪已義或因於蔽善何謂得朋才
旣由於爾知聲豈資於我鼓顏回好學在尼父之所稱
蜀嚴逃名因揚雄而益顯當責如蘭之契庶諧伐木之
風

武溪集卷十二



總校官庶吉士臣張能照

校對官檢討臣裴謙

謄錄監生臣金士虔

謄錄監生臣劉銓瑛

欽定四庫全書薈要

集部

武溪集卷十

三至五

詳校官助教臣常循



欽定四庫全書薈要卷一萬四千二百六十八

兵部

武溪集卷十三

宋 余靖 撰

判詞



丁為大夫薦而不祭或責其不孝辭云未給圭
田

羔羊有位姑務奉先田祿未頒則當殺禮志不愆於率
義理亦貴於從宜丁一命方榮十倫尤闕班趨表著祭
當取於首時地薄都家薦乃從於仲月儀雖偏下事貴

舉中且圭潔取名尚闕容於百畝而博碩為用難備數
於三牲豈故廢於烝嘗蓋有差於爵秩況國章具舉固
已辨於等威家廟致豐詎敢踰於名位宜許率常之節
勿貽忝祖之譏享以豚肩從鄙晏嬰之隘陳之羊饋豈
傷屈建之賢未全大夫之恩何切庶人之誚有嚴籩豆
苟殊豐昵之嫌無取粢盛當採薦新之制亦猶行古寧
以他規

乙為將兵士寒餒乞襦乙不之與或責其不撫

士卒辭云人臣無私施

輕財撫士雖得衆心散物擅恩恐非臣節將舉即戎之責須存許國之誠乙也黃石貽謀漢壇膺寄飄風冽冽方當墮指之寒被練將將忽有乞襦之士賢哉臨事展矣能謨志在恤人誠合矜其凍餒美當歸上豈宜奪彼慈仁自敦御下之方將教尊君之禮絕甘分少固宜推彼赤心別嫌明微何必行其小惠縱使求之不得我乃思而無邪散漢將之黃金雖聞大畧均楚師之挾纊蓋

自溫言憫一夫未足稱賢存大義故能和衆下車濟涉
子產所以貽譏在筭絕私伸達於焉見賞不敢專也可
以事君雖無與之不失其正

乙春田火弊或告其暴物辭云獻禽以祭社

啟蟄布和誠憂害物菜田展禮寧廢獻禽事未悖於天
時理蓋勤於祀典乙素推卓識頗達舊章因農隙以備
儀順春蒐而行古下綏止殺圍必戒於掩羣揚炬弊田
義將存於擇孕益取順天之制寧同暴殄之威乾豆是

求充廟庖而有品青陽式屆伸地道以何慙止車用協
於周官艾蘭聿符於魯道雖區萌旣達須行太皞之仁
而麋卵無傷奚爽虞人之職縱國門之將禁在野禮之
必行原隰未耕方及焚萊之候置罟暫往終非委獸之
徒旣薦以松之神式協除苗之害因蒐狩以習武自有
邦儀戒馳騁之發狂未羞古訓克比獻鳩之度無愆配
稷之容

丙舉盜以為公臣或非之辭云可人也所與遊

避爾

殖財斯濫誠曰非賢染惡可矜奚傷見舉未爽援能之
道庶臻遷善之風丙識達惟精名光則哲爾將喻利旣
結黨於萑蒲我務擇才故取節於葑菲跡雖殊於疾惡
志所貴於激貪所遊弗近於正人縱乖積習善誘必成
於佳器亦可甄收況多能而是求諒一眚而何掩陳太
丘贈縑致悔遂絕貪民戴若思投劍改容卒為雅士庶
有期於折節寧無謂以惠姦苟非逸羣之材奚勝籲俊

之舉不須求備管庫自可同升勿謂難知奴虜猶聞見
擢儻能旌別庶免滯淹行匪固窮誠愧郅雍之視善當
必用無輕管仲之謀亦冀從權未為失選

甲葬讐人之妻或責其不義辭云滅其可滅葬
其可葬

執兵有報睚眦旣除委骨無歸瘞埋何爽雖疚心於虐
我難取諂於非仁甲智妙見機志先行古齊襄自立已
雪九世之仇紀婦何辜方崇四尺之墓且勵精於刷耻

遂順變以從權釋憾是圖患雖深於側目遺骸苟棄禍
豈及於齊眉徒有切於忘生固未宜於遷怒義士切齒
漢俠誠務於遺身婦人僵尸魯史嘗譏於非禮姑存大
節無愧責言況乎損怨為忠爰著作威之誠益仇非智
當從敵惠之謀矧異枕戈之人那傷掩骼之化復讐因
病尚耻非夫加禮旣亡胡為不義公羊可採青烏必行
甲授田不入國征里尹責之辭云加田

賦均三壤必入地征賞有加田豈同民算式舉優賢之

典盡寬量歲之科甲貴列命夫名高國士分地之利祿
均旣啟於都家食土之毛功懋復頒於畎畝何哉里尹
懣彼邦經稅熟貢新雖欲歸其王府方輸錯出寧宜及
彼圭田旣異任民之居盡視節財之式奠什一之賦爾
誠務於狗公取三百之禾我蓋因於褒德當遵古制無
亂彝章本殊食菜之榮自分公邑復異連阡之富止實
私囊賜旣表於主恩貢難從於吏議指膏腴而固請况
非王翦之謀美勲勞之所加宜守周公之法式期勸善

當許免征

乙為刺史術者告將有火災請用瓘掌以禳之
乙不許或告其愛寶棄民辭云天道遠

政經勉順誠務恤災天道淵微寧先惑衆自得安邦之
術誰興愛寶之譏乙也任重股肱憂分宵旰誠每敦於
亮直志靡尚於奇袤執技之徒視祲遽稱於星變先時
而備奠玉請禳於火妖既務宣風寧從語怪雖鬱攸之
氣將深撤屋之虞而幽崇之儀曷容非鬼之祀矧條教

之斯職當器識以攸先王商正議於水災民憂自息劉
劭抗詞於日蝕乾象焉知固宜求福不回式昭非禮勿
動若事存萌漸弗絕本於訛言即害有流行恐誘民於
左道儻責躬而未至雖致享以何為塗潦可防當思廉
范之教瓘瓘不用未傷子產之賢編氓可使由之太守
斯得之矣縱違裨竈之辯終免鄭人之憂

丙濟君之難賞之不受曰非為身也或責其矯
臨危奮命可謂盡忠辭賞逃榮何傷潔已勇旣稱於排

難志且異於飾非丙也位列王臣才標國幹推誠可以
貫白日吐氣可以截飛電竭以股肱拯綴旒於將墜冒
其鋒鏑示勁草以彌堅當秉節以無渝諒殺身而何懼
疇其爵邑將酬汗馬之勞棄彼利名遂返屠羊之業蓋
濟君而是切豈徼賞以為心董安于不尚戰功固慙狂
疾介之推靡貪天力爰比竊財始隆報國之謀終獲退
身之美斬肩是衛書竹帛以何慙成命旣辭雖茅土而
奚貴自高淡泊孰謂矯誣魯連能下於聊城寧邀縲組

申胥再安於楚國無取執圭忠義可嘉撫讓那爽

乙為政請隳都城譏其無備辭云都城不過百

雉

政在養民豈勞多備城苟過制何謂弱枝爰啟見機之
謀當許復隍之請乙器能高世忠亮拔羣方推許國之
忠遽展濟時之畧以謂金湯作固誠多藩屏之功控帶
相高必啟寇戎之害式陳良算允叶明謀庇民無假於
深池頽牆願填於濬洫且赫連定霸雖增蒸土之勞士

薦知權寧慎實薪之役深詳得失妙察興衰縱墨翟多
能九攻聞解帶之術而鄭丹遠識五大有在邊之譏蓋
虞乎讐必保焉盍循乎古之制也今京不度在百雉以
貽憂夫魯有初諒三都之必毀允合仲尼之志何慙由
也之忠

甲父在而受車馬之賜或責其違禮辭云崇君
命也

爵祿有制當避父尊車服所旌難廢君命恩苟推於懋

賞禮未爽於從宜甲也器幹淳深識局淵懿趨庭承訓
既盡綵衣之歡報國成功遂膺先路之賜遽聞譏刺當
體謀惟古者襲爵於父兄故當殺禮今也擇材於俊乂
豈限常科博古所貴於知今達禮亦宜於察變向魑無
祿而多馬誠紊國章張酺有位而賜車奚傷子道無拘
介節式協大猷時既改於漢官事難盡於周禮叔孫以
葬平子雖欲妄詞石建及門當代未聞致誚但守一經
之教寧懷駟馬之嫌况親在而益榮豈位高而見怒

歲有札荒刺史欲移其民縣令云民有所守不

可移刺史不許

歲功不順誠貴利遷民守有常固難遠徙雖舉恤災之
政必存從俗之謀眷彼編氓處茲列郡札瘥為梗當天
厲之流行旱澇多傷致地財之耗斲蓄欠九年之用食
憂二鬴之艱竹符以適彼樂郊庶推恩於拯救蒲宰以
越在他境恐成弊於流庸皆懷恤下之心當體濟時之
道減其漕運彼旣切於移民守以封疆此固請於歸粟

雖周官之備紀在唐令以兼明鄉有寬閒當徙家而必募地居雄望俾減戶以誠難薄征固可以撫甿荒政不專於就賤晉國舉郇瑕之壤雖喜近甸魏王移河內之人亦譏罪歲故知拯患必務從宜

乙居草澤被召到都謁見不拜或責其失禮辭云禮者忠信之薄吾以忠信奉上

韜光絕俗則全高尚之風應聘趨朝必順尊卑之序雖凝情於方外難失節於君前苟亡九拜之勞是慢五常

之教乙鑿坏曠達築室逍遙擇豹霧以深藏緘鶴書而
屢降沈冥谷口旣祇命於軟輪咫尺天威遽抗容於文
陛務誇誕而廢禮忘盤辟以致恭問以辨之徒云忠信
之薄必有尊也奈失朝廷之儀辭旣妄興義將安取若
隱而未見固當高蹈於山林且賁然來思豈宜長揖於
君父縱曰遺榮於軒冕其如被旨於絲綸昔周亞夫之
御戎徒矜介士蘇子卿之秉節止對單于未聞謁見之
初全微拜起之度許由洗耳雖輕萬乘之權盧鴻好名

已悖四維之道宜從斥罷用肅威儀

丁行堂贈人告其左道辭云古禮

國儺歲事式期毆疫堂贈肆儀孰稱疑衆蓋取順時之
禮無貽失節之譏丁也識局該明事機詳練礫牲致用
畢春氣於九門執蒞備容逐癘神於四裔何哉致誥曾
莫表微蓋示訖於歲功亦猶行於古道執戈揚盾旣取
象於毆除逐舊迎新且齊名於攻禳理符有事為匪無
稽宣尼立作之言其來尚矣周人清廟之制而忘諸乎

葦索之用克宣朱衣之容式顯食虐食魅其徒寔繁無
算無方厥儀斯在呂禮備存於梗槩漢官尤襲於源流
執巫人之桃謂予不信削神荼之版非爾所知自得彛
章誰云左道

乙自為鼎銘以稱揚其先祖之善或譏其蓋失
數美辭云孝也

矜功作器誠慮褊心揚名顯親何傷善教爰表奉先之
志奚稱數美之非乙不私其身亦猶行古念彼先人之

道綽著光輝飾以君子之辭敢忘論譔聿崇彝器用紀
嘉猷榮考父之芳銘家聲不墜勒景襄之茂閎祖德長
存儻有善而不知諒為人而非智述而不作所以纂乃
舊勲煥乎有文所以著之後世苟或譏其隱惡無乃失
於知言數宋督於華孫蓋羞失禮箴季平於武仲亦謂
妨農況承襲之是先豈揄揚而見誚勒盤盂者尚聞垂
訓紀鐘鼎者孰謂非宜所期動則有成是冀死而不朽
異彼周王之作寃椒貽譏同乃孔悝之銘徽猷備載古

之制也人其謂何

甲建議請標檢遠年逃戶田土充百官職田可
以激勸廉吏難者以多少不同而勢家奔競
請盡没官

仕田有制蓋欲厚賢邦土未均盡防趨利將舉建中之
策必遵經世之謀況乎百郡張官九州分壤建議以豐
其衣食請頒曠土於羣僚難者云限以封疆且患庶邦
之異制共期康國咸竭危言將研事機當先治體何則

古者分其縣削皆給受於王田今也廢其井廬悉割裂
於民業必若取足於逋播豈不生奸於覬覦矧雄望之
有殊奚畎畝之能一旦名都大邑多者有連阡之收而
瘠土近郊少者乏立錐之所遂使下自銓管上暨公侯
徒間膏腴罔知勤恤上地沃野咸歸貴勢之家游戶墮
農悉為衣食之客未立均平之度頗增奔競之風實橐
裝者則云可勵廉隅無采地者豈曰悉為貪污雖五十
畝之舊制嘗聞孟子之談况三百廛之上腴已壞商君

之法公邑家邑亦既異於周官寬鄉狹鄉且已頒於唐
令豈流庸之未復因刈穫而是圖指曠野以為田配罷
民而增賦奉其祭祀方殊食菜之榮異其州閭奚偏種
秫之入既小惠之未徧當大猷之是經苟謂必勸其廉
平曷若例加於俸給請從新法無取舊規

大廟薦享甲有總喪遣充執事科太常罪訴云
甲不自言

吉蠲薦信蓋重於至誠哀素居心寧行於大禮事雖由

於廢命過當坐於隱情況乎宗祏鴻儀蒸嘗順祀備牲
牢而登俎將示恪恭釋縗經以及門恐非齋潔再申令
甲綽布舊章胡為羞薦之徒敢亂吉凶之制禮稱寧戚
忘布縷之在躬時及告虔披冕弁而與祭觀其罔上無
乃黷神俾居籩豆之間將失廟祧之體且堂事室事固
合行之有經錫纁疑纁安得掩而不問式期合理宜辨
終詞向若凶釁素聞罪必歸於常伯苟或哀摧自秘罰
當正於總親庶無濫於刑章亦不愆於祭典

乙代判官文書有司科罪辭云本案事直

官命未改各謹分曹人心不同寧容假手苟自輕於觸
法諒奚測於挾私乙樸樛微材斗筭賤器忝庇身之官
邑方恃獨賢顧堆案之簿書俄欣代判旣彰落筆之敏
旋聞離局之奸且虞人至賤罔狗招弓之儀雖宗祝多
能寧兼越俎之事宜慙過舉無或失辭足驗名愆胡云
理直分職辨治况乃無相奪倫染翰飛文安可不思其
舊縱虞滯訟盍問攸司小智爰居尚惡挈瓶之假彛章

可舉當知代斲之傷必附深文奚勞薄訴官無留事爾
雖稱於徇公邦有常刑我用科於離次

丁去官而受舊屬饋與或告其違法訴云家口

已離本任

食糲養廉執心斯可及瓜受代改操則非安得因其去
官遂不思於潔已丁也才高有位秩滿將遷飛鳳銜書
亦旣榮於寵命解龜罷政遂靡讓於好羞謂行邁之有
期曾厭私而不懼況古之循吏名列青編掛府丞之魚

誠在蒞官之日留壽春之犢實惟去任之晨何乃肆貪
罔知守節歌鄧侯之五鼓曾是遵途持山陰之一錢當
思勵俗徒欣苟得豈曰能謀重耳受殮蓋當於旅食叔
魚反錦益愧於公行如云不爾瑕疵則恐罔知紀極推
恩布化未聞畫象之遺風黷貨啟奸遽恣貪狼之本性
縱離境壤終喪廉隅減三等以定刑乃九章之垂制

壬盜乙馬歸而產駒法司斷并駒還主盜以駒

非正賊不伏

盜肆斂攘雖祈苟得物有蕃庶誠宜復歸俾懲敗類之
心式叶防淫之典壬也萑蒲命侶溪壑凝懷秀稟房精
旣攘秦穆之駿價傳龍種遽產渥洼之駒初欣執勒之
奇俄敗穿窬之跡永言司憲式舉成規代勞方戀於君
軒必復其始游牝縱生於爾室亦又何求旣盡意於邦
經尚見非於寇黨徒煩亟請難改前言且貿易之貲他
類猶聞於歸主矧阜蕃之畜見賊安得而惠奸無差伏
櫪之謀當從共阜之本宜詳治體奚取盜言獻美乘於

虞公終為晉府返名駒於北叟式叶莊篇勿輕轅下之
賊必採受中之法

庚二罪俱發過失犯流單丁犯徒法司以加杖
是重判官以流坐為先

凶德兩彰播棄為重贖刑兼用居作攸先苟擬議以無
私則憲章而弗紊庚智慙假器愚甚守株備慮乖宜遽
抵投荒之禁猖狂自恣仍書坐右之銘惡既覩於腥聞
理尚疑於決讞罪因過失法乃從於贖金人或孤惇刑

則止於加杖罰金非播棄之比加杖殊居作之勤憲司
云入以百鑠未為重斷主判以傷於一跌亦附輕條既
是非之不同在取捨而宜審必詳常憲當協大中罪若
等於徒年須從箠令罰且深於流宥難用鞭刑所冀慎
思寧煩偏見因未投於魑魅誠慮恢疎法雖增於榜笞
亦歸欽恤宜從出貸庶叶泣辜

壬持刀仗入讐人家法司以謀殺人論訴止一
人不伏為謀

挾刃獨行雖非結客傷人有志何異同謀旣式辯於雙
家復奚輕於邦禁壬也勇惟尚氣意在遺身追蹤燕市
之豪託跡夷門之俊始因胥怨方增嘗膽之羞終乃交
仇遂起執兵之變將攻舊隙爰肆偏心操盾持矛雖未
諧於釋憾升堂入室固已切於捐軀曷為加辟之期猶
恣欺心之語挾專諸之匕首足驗輕生及趙盾之寢門
寧無發慮奚煩偕往乃謂矢謨豫讓斬衣本乏談諧之
旅白公礪劍那聞協贊之徒在怨府以斯明豈邪朋而

是問雖或先或後弗詢死黨之言且已傷未傷當用調人之禁爾之罪也夫復何云

乙家有論語識或告其私畜禁書不伏

疑衆成書必嚴邦禁解經有說寧廢家藏義已著於公行罰豈同於私習乙志勤稽古學富窮微巾箱如務於多聞几案遂存於異覽名以出義雖比桓譚之非書不盡言蓋述仲尼之志何或人之致詰昧前聖之垂規齊七政於璣衡本殊祕象立五經之管轄當備微文豈令

該博之徒盡比包藏之禁至若乾文淵邈時變幽深皆倚伏之難明恐生靈之易惑亂之所由生也民不可使知之爰著前聞式嚴彛憲我異於是人其謂何緯侯相高號雖同於怪牒典墳一貫理終異於神經自當參驗人區豈獨探抽真蹟術符箕子猶存建極之談時匪李斯難舉挾書之律

丁以律令式內數事不便奏乞改行大理以不
先申省斷徒訴稱詣闕上表不伏

削牘南宮雖存舊制奏書北闕難坐直言當擴撫而有
謨豈彌縫而獲罪丁公忠秉操亮直推誠方堅事主之
心遂啟經邦之策懼滋章之積弊或未協中思簡要以
成規弗慙慮始固非矜於出位蓋祇務於適時爰倚舊
章以明新意雖飛文綵筆未經喉舌之司而封疏皁囊
已竭腹心之語胡為列棘尚昧彛儀謂革故於丹書必
取模於會府將言利害宜究指歸若道遠邦畿議當資
於八座况躬趨輦轂言必達於九重事所貴於隨機理

豈煩於致詰畫一苟虧於前定利百何爽於更張子產之鑄鼎定刑縱貽譏於叔向商君之徙木行令固難屈於甘龍苟可彊國利人何必守文拘制無塞言路以叶政綱

壬賣七歲女子法司斷徒訴云家貧賣而葬母鬻良犯禁固涉不慈卜葬慎終則先惟孝志且隆於喪紀罪盡寬於簡書壬也啜菽興嗟寢苦居苦旣切終堂之痛將興筮宅之謀三寸桐棺嘆未諧於壤樹七歲孺

子固願易於囊錢庶展事於泉局遂割情於天性胡為
執憲必使服刑且有無稱家慮居雖立於明誠而豐儉
中禮斂形當盡於銜哀苟寃宐之弗完則嗣續而安在
故郭巨埋子天尚聞於降祥董永賣身時未覩於加罪
欲明慈幼之道先存送往之誠必覈是非須詳得失苟
獲平居見售宜稱壓賤之條其如鉅痛填膺當許事親
之節豈可委之溝壑而欲篤其閨門發喻風枝旣永傷
於荼毒未安蒿里尚何愛於童蒙固在原情無煩寘罰

丙為縣令農務未畢而差夫修隄州責其非時
辭云洪水泛濫不修恐害居民

勤民之役雖戒失時止水以防所宜救弊用必先於急
務理豈徇於常情當許從權何煩致詰眷茲縣壤旁界
河流綺塍每每未畢耕耘之務金隄浩浩將成泛濫之
災誠有慮於傷農必先防於害物猝草把土彼雖勤於
大田培薄增卑此亦憂於小決義難施於兩可利必歸
於一源緩斂刈於夫家所損者小恣漂流於我里其傷

實多然則得在從宜失於備豫繕完有制當農隙以先
成昏墊無虞任水荐而何害或有防於蟻壤亦未耗於
民材若乃循舊攸虧僞功斯闕憂同瓠子方展計於負
薪勢等孟津乃効愚於捧土當從州責以勸吏能

庚為獄官拷囚數滿不承欲取保放之法司云

贓狀露驗宜據狀斷

拷掠弗承誠宜判遣贓狀或露亦可稽詳苟再思而不
疑在兩端而必叩庚也職司叢棘伏念幽囚縲紲之中

五聽備研於辭色極楚之下三訊未窮於是非眷茲獄
法之官各以律令為據司圜以榜笞既極不加刑焉執
憲云縱跡可尋斷斯獄矣然則五毒備至有詞者難俾
伏辜九章甚明隱情者不宜免戾至若事必先於審克
罰無宜於濫施昔漢祖柏人貫高被刺肌之痛楚相亡
壁張儀淪刻骨之寃皆出狐疑終聞開釋若乃殺人者
既彰實狀坐贓者已獲見資且明白而可知諒結正而
無枉非此物也胡可比焉理貴從寬法難任意

獄囚未斷而格令新改法司引後勅為正判云
犯時格輕新令稍重欲從輕法

沿革異宜雖遵後命俘囚待弊必從輕典當順以寬之
教庶廓在宥之懷眷彼庸材齒于編戶出作入息方承
蕩蕩之風惡稔貫盈遂陷恢恢之網聿罹昭憲乃寘圜
扉詞置鈎金將成於具獄令行徙木忽改於舊章旣丹
筆之未書故兩端而起議將垂經世之範猶疑在禁之
人憲司以其命惟新何可廢也從事以惟刑之恤不已

重乎再詳抵禁之初方當改度之始刑必當罪法寧與人且除舊以布新雖宜捨舊奈先輕而後重姑合適輕令式具陳古今共貫縱利百而變弗取樂成稽畫一之規固聞前定俟其來犯乃用新書

武溪集卷十三